

Tematikane butjarlina ano Delčevo „O sikljovipe e Romengoro thaj o bibutjarnipe e nabutipaskere etnikane khedipangoro “

Ko 27^{to} thaj 28^{to} marti 2008 berš ano Delčevo sine ikerdi butjarlin ki tema „O sikljovipe e Romengoro thaj o bibutjarnipe e nabutipaskere etnikane khedipangoro“. I resarin e dujedivengere butjarlinakoro sine te oven definirime e lokalnikane problemoja thaj e trubutnipa e romane khedipangoro ano regiono ani ranik e sikljovipastar thaj butikeripastar. Akala duj teme sine ulavde kerde butjenca ane aver dive te šaj te ovel kerdo poefektivnikano adresiripe e resarinakere grupengoro autorizirime bašo nakhavipe e problemengoro ko lokalnikano nivelo.

Ano jekhto kotor tari butjarlin ki tema *sikljovipe* lele than e prezententoja tare sikljovipaskere institucie thaj tari lokalnikani radži (sa ko sa 13), thaj prezententoja tare biradžikane organizacie (11) taro Delčevo, Pehčevo, Berovo, Makedonska Kamenica, Vinica thaj Kočani. Ano dujto kotor e butjarlinakoro ki tema *butikeripe* lele than e prezententoja tari lokalnikani radži, e reoneskere Centroja baši socialnikani buti thaj e Agencie bašo butikeripe (sa ko sa 9), sar thaj prezententoja taro biradžikano sektoro (12) taro Delčevo, Pehčevo, Berovo, Makedonska Kamenica, Vinica thaj Kočani. Solduj kotora e butjarlinakere sine kerde palo principio e butjakoro: lociripe e trubutnipaskoro ki romani khedin pale komune thaj keripe buti ke akciakere planoja bašo arakhipe solucia olenge.

Uzal e but specifikane problemoja karakteristikane baši sakoja komuna ulavde, ani sfera e sikljovipaskoro sine definirime sa e jekhethane problemoja ano sasoično regiono: ekonomikano bišajdipa ke romane familie, nabutipaskiri minsa kori e daja/dada tari romani populacia bašo educiripe peskere čhavengoro, stereotipia kori e terminirime sikavutne, tikni komunikacia ki relacia čhavo-daj/dad-sikavutni/o. Sar rezultato tari butjarlin sine kerde ulavde [akciakere planoja ani ranik e sikljovipaskoro](#) baše komune Delčevo, Vinica, Pehčevo, Berovo thaj Makedonska Kamenica.

[Akciakere planoja ki tema butjarnipe](#) baše komune Delčevo, Vinica, Pehčevo thaj Kočani sine kerde thaj adjaar, kana sine zurarde e akala problemoja ane štar komune: nanipe taro edukaciakoro kadaro thaj o trubutnipa e džikvalifikaciakoro, nainformiripe e romengoro baše šajdipa bašo butjarnipe thaj nanipe e interesoskoro bašo avipe dži o kurko e butjakoro, diskriminacia tari rig butjarne deutenngiri, biničalo apliciripe.

Ano thavdipe e butjarlinakoro sine konstruktivnikano keripe buti maškar e prezententoja ko biradžikano sektoro thaj e prezententoja e instituciengoro. Sine dendo phandlo lafi kaj si trubutno xarne vaxteske te ovel keripe e detalnikane akciakere planeske thaj kaj si trubutno ko jekh than te oven šunde e gindipa baše pharipa thaj e bahania bašo lengoro nakhavipe tare prezententoja e biradžikane organizaciengoro, instituciengoro thaj e lokalnikane korkoriradžinakoro. Ano dikhipe e aktuelnikane situaciakoro avilo dži e jekhe thane phandle lafeskoru baše sa e komune kaj panda isi diskriminacia e romane populaciake, baro čororipe thaj nanipe e interesoskoro e Romengoro sar bašo sikljovipe, adjaar thaj bašo butikeripe.

I Fondaciata Instituto putardo amalipe – Makedonia kerda implementacia ki putardi debata ani kolaboracia e lokalnikane ofisosa ko proekto ano Delčevo (Regionalnikano centro bašo autoriziripe Delčevo, anglederutno Centro bašo dendo dumo e BRO-enge-Delčevo).